

Premis dal chantun Grischun 2023

Premi grischun da cultura 2023 (30 000 francs)

Tilla Theus (1943), architecta, Turitg/Valbella/Cuira

La Regenza surdat a Tilla Theus il Premi da cultura 2023. Chasas communalas, edifizis d'abitar e da fatschenta, hotels – l'architecta grischuna ha stgaffi ina ritga ovra. Ella è ina maistra da ses mastergn ed ha renovà la cultura da construcziun. Sco artista da construcziun è ella ida e va ella atgnas vias e sco architecta è ella sa fatga valair en in mund dad umens.

Ils premis da renconuschientscha 2023 (mintgamai 20 000 francs)

Bruno Cathomas (1965), actur, Cologna/Laax

La Regenza surdat a Bruno Cathomas in premi da renconuschientscha. El è in actur passinà ch'è gist uschè enconuschent en Svizra sco a l'exteriur e ch'è da chasa tant en il film sco er sin tribuna. Cathomas ha ina preschientscha excitanta sin la taila – saja quai sco perfecziunist, sco intrigant, sco carugna, sco retg, sco inamurà, sco pur u sco nar – el persvada en mintga rolla.

Annetta Ganzoni-Pitsch (1958), scienziada da litteratura, Berna/Schlarigna

La Regenza surdat ad Annetta Ganzoni in premi da renconuschientscha. En sia activitad professiunala – ma er lunsch sur quella or – s'engascha ella fermamain per la litteratura rumantscha e taliana dal Grischun: sco scienziada, sco intermediatura, sco editura, sco recensenta, sco lectora e sco docenta.

Dieter Jüngling (1957) ed Andreas Hagmann (1959), architects, Cuira

La Regenza surdat als architects Jüngling e Hagmann in premi da renconuschientscha. Ils dus architects han enritgì la fatscha architectonica dal Grischun. Els èn constructurs entusiasms e san – sco artists da construcziun – co metter segns en ils abitadis ed en las cuntradas.

Guido Lardi (1939), magister, politicher e promotur d'art, Poschiavo

La Regenza surdat a Guido Lardi in premi da renconuschientscha. Guido Lardi ha prestà gronda lavur per la Val Puschlav, saja quai en il sector da la scola, da l'art e da la politica. En tut sias activitads è el s'engaschà en moda extraordinaria. Cun valurisar e cun promover l'intermediaziun dal patrimoni cultural da sia patria ha el mussà, ch'el è ina pitga purtanta da la cultura locala.

Reto Mayer (1953), musicant, dirigent, Scuol

La Regenza surdat a Reto Mayer in premi da renconuschientscha. Il dirigent e musicant d'instruments a flad da Scuol è in musicist amatur, cumponist e dirigent passinà cun gronds merits per la musica da giuvenils en l'Engiadina Bassa e per la musica instrumentala en il Grischun.

Letizia Scherrer (1968), chantadura da concert, Feldkirch/Trun

La Regenza surdat a Letizia Scherrer in premi da renconuschientscha. La sopranista chanta sin las tribunas ed als festivals sin tut il mund. Adina puspè turna ella enavos en il Grischun ed enritgescha ils concerts dad «Origen» u da la filarmonia da chombra dal Grischun e mussa a la giuventetgna sursilvana da chantar.

Ils premis da promoziun 2023 (mintgamai 20 000 francs)

Elena Bertossa (1990), creadra da mascras, costumista e scenografa, Hamburg/Roveredo

La Regenza surdat in premi da promoziun ad Elena Bertossa, la scenografa talentada e creadra da mascras originalas, quai cun la persvasiun, ch'ella cuntinueschia a stgaffir cun l'artisanadi ch'ella ha emprendì novs munds e novas fatschas per il teater e per las tribunas.

Fadri Cadonau (1996), artist figurativ, Turitg/Glion

La Regenza surdat a Fadri Cadonau in premi da promoziun. El è in artist grischun cun grondas ambiziuns: en il format, en l'expressiun artistica, en ses ideals.

Vito Cadonau (1992), cuntribassist e cumponist, Turitg/Castrisch

La Regenza surdat a Vito Cadonau in premi da promoziun. En sias cumposiziuns reflectescha el musica contemporanea: il resultat èn ovras artisticas persvadentas cun suns frestgs fin ussa strusch udids. Sia carta da visita artistica cumpiglia il giu virtuos cun il bass e ses agir premurus sco manader d'ina band.

Christian Imhof (1988), schurnalist, editur, musicist, Grüşch

La Regenza surdat a Christian Imhof in premi da promoziun. El è in musicist e producent da musica original e sco charedactur da la «Prättigauer Zeitung & Herrschäftler» in schurnalist talentà cun blera fantasia.

Anna-Laura Klucker (1995), designra, Tumein

La Regenza surdat ad Anna-Laura Klucker in premi da promoziun. Cun fantasia e cun inschign artistic persvada la designra cun il pitg da crusch grischun en sias creaziuns da moda. Ella ha sviluppà la pitschna firma da moda Yuli che venda moda festiva e che mussa, co che la vestgadira ed ils accessoris pon vegnir creads e producids cun resursas indigenas favuraivlas al clima.